



Minggu, 05 Nopember 2023

Ogen: Juna 3:1-4



Kesempatan Kedua



Tepet manusia si ietepa Dibata labo lit si sempurna subuk i bas perukuren bage pe perbahanen. E maka pernah nge kerina erbahan si lepak ntah salah, la bijak i bas erbahan keputusan seh maka lit kalak si irugiken bage pe la ngena ate Dibata. Harison Ford nuratken maka 'kita semua memiliki perubahan besar dalam hidup yang kurang lebih seperti kesempatan kedua.' Bagenda me si jadi i bas kegeluhen Juna, si pernah ngaloken pendilo Dibata guna erberita ku Niniwe tapi nilah ia ku ingan sideban. Perdalanenna i bas kiam nadingken pendilo Dibata e maba sada perubahan si mbelin i bas geluhna. Kenca jumpa perbeben dinggen igejabna maka kejadi e erbahan kalak sideban pe jumpa kiniseran ras kebiaren. Kenca penggejapen ras pertotonna maka peduakaliken isuruh Dibata ia guna ermomo ku kuta Niniwe. Ipakeken Juna kesempatan ke dua si ibereken Dibata man bana, lawes ia ngikutken kata Dibata. Perbahan mbelin kuta e telu wari ia erdalan nahe maka terbentasinna. Gedang-gedang dalan ia ermomo maka 'empat puluh wari nari ikerneppen me kuta Niniwe.' Tentuna momo enda la saja persinget man anak kuta e tapi pe banci mpereh gara ras nembeh ate. La lit angin ras udan, tanda-tanda reh me berita si mbelin tapi Juna patuh dinggen tek nandangi kuasa Dibata. Bagi Juna, banci saja kita pe pernah nge ndatken kesempatan kedua i bas erbage si la payo si lakoken kita. I bas kegegalen si jumpai kita. Persoalenna, sipakeken nge alu mehuli ntah lang? Perlu kal kita metenget ras megermet nandangi erbage-bage situasi si bentasi kita. Sabab kesempatan pemena ras peduaken enda pe banci saja labo si eteh. Kerina seri saja siakap si jadi i bas kegeluhenta enda. Dibata perkeleng, perkuah ras nggit ngalemi kita. Mari sipakeken kerina paksa alu mehuli.

➤ *Megermetlah nandangi perbahanen Dibata, pakeken alu mehuli*